



REPUBLIKA E KOSOVËS/REPUBLIKA KOSOVA

GJYKATA THEMELORE PRISHTINE - DEGA E GJYKATËS LIPJAN

Numri i lëndës: 2021:101415

Datë: 26.06.2024

Numri i dokumentit: 05860248

C.nr.312/21

GJYKATA THEMELORE NË PRISHTINË-DEGA LIPJAN, Departamenti i Përgjithshëm-Divizioni Civil, si gjykatë civile e shkallës së parë në përbërje prej gjyqtarit individual Avdirrahman Gashi, me pjesëmarrjen e bashkëpunëtores profesionale Gentiana Dakaj, në çështjen juridiko-civile të paditësit O. Sh. nga P., të cilën e përfaqëson Egzona Gashi av. nga Lipjani, me autorizim kundër të paditurës Komunës së Lipjanit-Drejtoria Komunale për Shëndetësi, të cilën e përfaqëson Behar Krasniqi av. publike, me autorizim, për shkak të kompenzimit të t'ardhurave personale, pas përfundimit të shqyrtimit kryesor të mbajtur me dt.12.06.2024, në praninë e të autorizuarve të palëve ndërgjyqëse, merr këtë:

A K T G J Y K I M

APROVOHET kërkesëpadia e precizuar e paditësit O. Sh. nga P., si e **BAZUAR**, dhe **DETYROHET** e paditura Komuna e Lipjanit - Drejtorati i Shëndetësisë në Lipjan, që paditësit në emër të Shpërblimit për pagën e 13-të për vitet kalendarike 2018, 2019 dhe 2020 t'ia paguaj tri paga bazë (nga 425.-€) apo shumën prej 1,275.00-€ dhe në emër të kompensimit për punën në punkte për periudhën prej dt.12.06.2018-10.06.2021 t'ia paguaj 30% të pagës bazë (425.€) shumën prej 127.50-€ në muaj apo shumën e përgjithshme për 36 muaj, shumën prej 4,590.60-€, me kamatë ligjore prej 8% nga data e ushtrimit të padisë dt.26.05.2021 e deri tek pagesa definitive si dhe në emër të shpenzimeve të procedurës kontestimore t'ia paguajë shumën prej 403.20-€, të gjitha këto në afat prej 7 dite nga dita e dorëzimit të aktgjykimit, nën kërcënimin e përmbarrimit të dhunshëm.

A r s y e t i m

Paditësi O. Sh. nga P., në këtë gjykatë përmes të autorizuarës së saj, ka ushtruar padi ndaj të paditurës Komunës së Lipjanit, për shkak të kompenzimit të t'ardhurave personale në emër të pagës së 13-të dhe punës në punkte.

Në padi ka theksuar se paditësi sipas kontratës së punës punon në QKMF Lipjan në punktun Shalë dhe në këtë vend punon që nga hyrja në fuqi e KKS-së dhe i takon drejta në realizimin e pagës së 13-të në bazë të nenit 17 par.2 të kësaj kontrate të dt.12.06.2018. Paditësi punon në punktun në Shalë e cila është në largësi më tepër se 5 km nga QKMF-ja në Lipjan dhe në bazë të nenit 35.3 të KKS-së i takon shpërblimi deri në 30% të pagës bazë, andaj paditësit nuk i janë paguar këto të drejta dhe nuk është vërtetuar se e paditura nuk ka mundësi buxhetore për pagesën e këtyre të ardhurave, andaj paditësi i është drejtuar gjykatës për realizimin e këtyre të drejtave. Në shqyrtimin gjyqësor ka mbetur pranë padisë dhe pretendimeve të parashtruar në padi duke shtuar se dispozitat e kushtëzuara me mundësi buxhetore të punëdhënësit janë përmbushur ngase sipas Raporteve të auditimit të viti 2018, 2019 dhe 2020 të Zyrës Kombëtare

të Auditimit në Kosovë vërtetohet se e paditura për të gjitha kategoritë ekonomike ka pasur tepricë buxhetore dhe atë për vitin 2018 në shumë prej 1,279.743 euro, bazuar në fq.12-të të raportit, për vitin 2019 ka pasur tepricë në shumë prej 1,276.808 euro, bazuar në fq. 9 të raportit dhe për vitin 2020 ka pasur tepricë në shumë prej 2,218.292.43 euro, bazuar në fq.16-të të raportit të auditimit. Distanca ku ka punuar paditësja në Shalë ka prej 25.3 km larg nga QKMF-ja në Lipjan dhe për ta plotësuar këtë kusht duhet të jetë distanca së paku 5 km sipas KKS-së.

Me parashtrësën e dt.12.06.2024 pala paditëse e ka bërë precizimin e lartësisë së kërkesëpadisë më konkretisht si në dispozitiv të këtij aktgjykimi.

Në fjalën përfundimtare e autorizuar e paditëses ka deklaruar se mbetet në tërësi pranë padisë dhe precizimit të saj, duke shtuar se falën përfundimtare e ka përgatitur me shkrim e të cilës ia ka bashkangjitur ekspertizën financiare të ekspertit Shaban Sylja i cili në një rast tjetër të natyrës së njëjtë ka sqyruar mundësit buxhetore të të paditurës dhe për këtë arsye nuk është e nevojshme të angazhojmë ekspert financiar për këtë çështje që të krijojmë shpenzime të pa nevojshme. Ndërsa i kundërshtojmë pretendimet e të paditurës sa i përket mungesës së buxhetit në kategorinë e pagave dhe mëditjeve ngase vetë nga raportet e Auditimit vërtetohet se e paditura për gjatë këtyre viteve ka qenë në suficit edhe në këtë kategori dhe atë për vitin 2018 në shumën 59,179.00 euro, për vitin 2019 shumën 242,677.00 euro dhe për vitin 2020 shumën 30,103.09 euro, ndërsa çështja e planifikimit të buxhetit në kategorinë paga dhe mëditje bëhet përmes planifikimit dhe aprovimit të qarkores së parë buxhetore me Ligjin për ndarjet buxhetore të RKS-së për vitet 2018, 2019 dhe 2020 në të cilën janë të bashkangjitura edhe tabela 3.1 për të gjitha organizatat buxhetore përfshirë edhe Komunat ku vërtetohet se kategoria paga dhe mëditje buxheti i ndahet në bazë të numrit të të punësuarve, andaj këto pretendime mbështeten Ligjet për ndarjen e buxhetit për vitet kontestuse si dhe në ekspertizën të cilën e kemi bashkangjitur në fjalë përfundimtare, ngase e paditura nuk i ka përfillur procedurat për planifikimin e buxhetit me qëllim të krijimit të mundësive buxhetore për pagesë të pagave të 13 dhe për kompensimin në punkte. Në fjalën me shkrim ka shtuar se nga provat që u administruan në këtë çështje kontestimore, Kontratat e punës, Vërtetimi i lëshuar nga QKMF Lipaj, ekstrakt nga Google Maps për distanconin LIPJAN-SHALË dhe shkresa tjera që janë në dosje të lëndës, mjaftueshëm është argumentuar baza ligjore e kërkesëpadisë ngase: Pala paditëse në bazë të Kontratës së punës është i angazhuar në Puntin-Shalë, e cila më shumë se 5 kilometra larg Qendrës së Mjekësisë Familjare në Lipjan, e bazuar në nenin 35.3 të Kontratës Kolektive Sektoriale në Kosovë të datës 12.06.2018 të nënshkruar në mes të Ministrisë së Shëndetësisë dhe FSHK, u takon shpërblimi deri në 30% të pagës bazë. Ndërsa në bazë të nenit 17, par. 2 të Kontratës Kolektive Sektoriale në Kosovë të datës 12.06.2018, palës paditëse i takon shpërblimi për pagë të trembëdhjetë për vitet 2018, 2019 dhe 2020 në lartësi prej 1 page bazë secilin vit. Fakti i mundësive buxhetore për pagesë të pagës së 13-të dhe punës në punkte vërtetohet sipas Raporteve të Auditimit për të paditurën që janë përmendur dhe mbi bazën e këtyre Raporteve rezulton se Komuna e Lipjanit ka pas suficit-tepricë të buxhetit në të gjitha burimet e fondeve dhe në gjitha kategoritë ekonomike, e bazuar në kërkesat e palës paditëse me tepricën buxhetore, e paditura ka qenë e obliguar të ia paguaj kompensoj shtesën në pagë për punën në punkte dhe paga 13-ta ngase ka pas mundësi buxhetore për pagesë. Duke qenë se me dispozitën ligjore të nenit 17 paragrafi 2 të Kontratës Kolektive Sektoriale të datës 12.06.2018 parashihet se "Punëmarrësi mund të kompensohet me pagën e 13 (trembëdhjetë) për çdo vit kalendarik, në vlerën e pagës bazë, sipas mundësive buxhetore të punëdhënësit", dhe nga interpretimi i kësaj dispozitive ligjore, si dhe Mendimi Juridik i Gjykatës Supreme me numër, 212/2023, i datës 09.10.2023, lidhur me plotësimin e kushteve ligjore për kompensimin e kushteve ligjore për shpërblimin e pagës së 13-të, përderisa çështja e kompensimit të pagës së 13-të, për punëtorët shëndetësor është e kushtëzuar me mundësitë financiare të punëdhënësit, përkatësisht nëse ka mjete buxhetore. E sipas mendimit juridik të Gjykatës Supreme të lartcekur rezulton se dispozita e sipër theksuar duhet interpretuar në atë mënyrë që e drejta për realizimin e pagës së 13-të, lind

kur punëdhënësi nuk e përmbush atë, ndërsa në asnjë mënyrë nuk arrin të provojë se nuk ka pasur mundësi buxhetore, përkatësisht nëse punëtori paraqet kërkesë për kompensimin e shpërblimit-pagës së 13-të, duke pretenduar se ka plotësuar kushtet e përcaktuara, mbetet në harrën e punëdhënësit që në secilën fazë të procedurës kur gjykata i jep mundësi për tu deklaruar me prova konkrete, të provojë çështjen e mundësisë buxhetore, për shpërblimin e tillë. Të njëjtin interpretim në mënyrë analoge duhet ta përfillim edhe tek dispozita e nenit 35 par. 3 i KKS me të cilin parashihet se "Punëtorët të cilët punojnë në punkte të cilat janë 5 kilometra larg Qendrave të Mjekësisë Familjare, ju takon kompensimi deri në 30% të pagës bazë, sipas mundësive buxhetore të punëdhënësit apo mënyre tjetër të kompensimit sipas ligjeve në fuqi". Në rastin konkret, e paditura deri më tani nuk ka ofruar asnjë provë për ta mbështetur pretendimin e saj se nuk ka mjete buxhetore për t'ia kompensuar pagës së 13-të dhe kompensimin për punën në punkte, në kuptimin e nenit 7 lidhur me nenin 319 të LPK-së dhe nenin 322 paragrafi 3 të LPK-së, ku parashihet se "Pala e cila e konteston ekzistimin e ndonjë të drejte e bartë barrën e të provuarit të faktit që e ka penguar krijimin apo realizimin e saj, ose në bazë të të cilit ka pushuar se ekzistuari, po që se ligji nuk parasheh diç tjetër" Po ashtu e paditura nuk ka dëshmuar me asnjë prove se ka përfillur procedurat për planifikim të buxhetit, respektivisht vlerësimin për krijimin e mundësive buxhetore për ndarjen e linjës buxhetore për të drejta dhe benefitet të punëtorëve të parapara me KKS, sipas procedurave për ndarjen e buxhetit para hartimit të qarkores së parë buxhetore sipas nenin 20.4 e 30 të Ligjit për menaxhimin e financave publike dhe përgjegjësitë. Sipas kësaj dispozita e nenit 17 par. 2 dhe nenit 35. par 3 të KKS e dt. 12.06.2018, parasheh detyrimin e të paditurës të përcaktuar me kusht, dhe atë "sipas mundësive buxhetore të punëdhënësit", e paditura si palë në marrëdhënie kontraktuese ka vepruar në kundërshtim me parimin e ndërgjeshmërisë dhe ndershmërisë, duke mos përfillur procedurat për planifikim të buxhetit, respektivisht duke mos kërkuar ndarjen e linjës buxhetore për të drejta dhe benefite të punëtorëve të parapara me KKS, sipas procedurave për ndarjen e buxhetit para hartimit të qarkores së parë buxhetore sipas nenin 20.4 e 30 të Ligjit për menaxhimin e financave publike dhe përgjegjësitë andaj, mbi bazën e këtyre pretendimeve dhe në bazë të provave të administruara vërtetohet baza juridike e kërkesëpadisë dhe lartësia e saj e precizuar me parashitësën dorëzuar në seancën e dt. 12.06.2024, të cilën i propozoj gjykatës ta aprovoj në tërësi të bazuar.

Shpenzimet e procedure i ka kërkuar sipas TA-së dhe atë për përpilimin e padisë, precizimin, një seancë gjyqësore dhe taksën gjyqësore për padi.

Në të përgjigjur në padi në formë të shkruar e paditura e ka kontestuar si të pa bazë ligjore dhe në bazë të kontratës ku është punësuar paditësja askund nuk ceket se punëtori e gëzon të drejtën e pagës së 13-të. Ka konsideruar se sipas Ligjit të Punës Nr.03/L 212 i cili rregullon kontestet e punës askund nuk ceket se punëtorëve të shëndetësisë ju takon kompensimi i tillë, prandaj kërkesës së paditësit i mungon baza juridike. Poashtu ka shtuar se KKS-ja ku është thirrur paditësja nuk ka fuqi ligjore për një zbatim të tillë sepse është në kundërshtim me Ligjin e Punës dhe dispozitat e KKS-së janë të kushtëzuara me mundësit buxhetore të punëdhënësit e gjithashtu edhe puna në punkte me rritje prej 30% të pagës bazë është e kushtëzuar me mundësi buxhetore, andaj ka propozuar që kërkesëpadia e paditëses të refuzohet si e pa bazuar.

Në fjalën përfundimtare i autorizuari i të paditurës ka deklaruar se mbetemi në tërësi pranë kundërshtimeve të cilat i kemi theksuar në përgjigje në padi ngase e paditura nuk është nënshkruese të KKS dhe mendoj se Komuna e Lipjanit nuk ka obligim për këtë detyrim ndërsa sa i përket për llogaritjes kemi theksuar se për llogaritja është mirë e saktësuar, andaj i propozojmë gjykatës që në mungesë të bazës juridike këtë kërkesë ta refuzon si të pa bazuar. Sa i përket pagës së 13 neni 17 par.2 i KKS-së cek që pagesa e pagës së 13 mund të bëhet nëse ka mundësi buxhetore punëdhënësi, në raportet e auditimit e kemi të sqaruar se mjetet e mjaftushme buxhetore nga kategoria pagat dhe mëditjet ka pasur vetëm në vitin 2019.

Shpenzimet e procedurës nuk i ka kërkuar.

Për vërtetimin e gjendjes faktike në këtë çështje kontestimore gjykata në procedurën e provave ka bërë administrimin e provave dhe atë me shiqimin dhe leximin e kontratës së punës nr.3-188/2012-SH të lidhur në mes palëve ndërgjyqëse, me shiqimin dhe leximin e vërtetimit të përvojës së punës nr.86/24 të dt.10.05.2024, me shiqimin dhe leximin e Raportit të Auditimit për vitin 2018, 2019 dhe 2020 lidhur me të hyrat dhe gjendjen financiare të të paditues, me shiqimin dhe leximin e hartës së destinacionit Lipjan-Magure të google maps, e të cilat prova gjykata i administroj dhe i vlerësoj në pajtim me nenin 8 të LPK-së, ku vërtetoi këtë gjendje faktike:

a) Paditësi O. Sh. nga P. është në marrëdhënie pune tek e paditura që nga dt.21.06.1999 e tutje në kohë të pa caktuar si Teknik i laboratorit në QKMF në Lipjan në punktun në Shalë.

b) Paditësi gjatë kësaj periudhe kontestuse respektivisht gjatë periudhës kontestuse pra gjatë vitit 2018, 2019 dhe 2020 i takojnë 3 paga bazë në emër të pagës së 13-të në lartësi prej 1,275.00 euro dhe për periudhën nga dt.12.06.2018-10.06.2021 nuk është paguar me shtesën e pagës bazë prej 30% që i bie në shumë prej 425 euro për muaj, pasi ka punuar në punktun në Shalë në një distancë që është mbi 5 km nga QKMF-Lipjan e që kjo shumë për periudhën në fjalë është në lartësi prej 4,590 euro.

c) Mundësit buxhetore të të paditurës për ti përmbushur detyrimet që rrjedhin nga Kontrata Kolektive Sektoriale e Shëndetësisë në Kosovë e dt.12.06.2018 janë të mundura apo kanë qenë të mundura për periudhën kontestuse.

Këto fakte respektivisht faktet nën a). gjykata i vërtetoi nga kontrata e punës nr.3-188/2012-SH e dt.16.01.2012 e lidhur në mes paditësit dhe të paditurës si dhe vërtetimi i përvojës së punës nr.86/24 i dt.10.05.2024. Faktet nën b) gjykata i vërtetoi nga lartësia e pagës bazë të realizuar nga paditësi, ndërsa distanca nga QKMF- Lipjan e deri në Shalë u vërtetua nga Harta e google maps. Ndërsa mundësit buxhetore të të paditurës për ti përmbushur këto detyrime u vërtetuan nga Raporti i Auditimit për vitin 2018 fq.12-të, për vitin 2019 fq.9 dhe për vitin 2020 fq. 16-të.

Me dispozitën e nenit 17 par.2 të KKS-së të datës 11.06.2018, parashifet se *“Punëmarrësi ka të drejtë në kompensimin e pagës së 13-të për çdo vite kalendarik, në vlerën e pagës bazë sipas mundësive buxhetore të punëdhënësit”*.

Ndërsa me dispozitën e nenit 35 par.3 parashifet se *“Punëtorët të cilët punojnë në punkte të cilat janë 5 kilometra larg Qendrave të Mjekësisë Familjare, ju takon kompensimi i 30% të pagës bazë, sipas mundësive buxhetore të punëdhënësit apo mënyrë tjetër të kompensimit sipas ligjit”*.

Me dispozitat e nenit 8 të LMD-së, të R. së Kosovës, parashihet se *“Pjesëmarrësit në marrëdhënien e detyrimit kanë për detyrë ta përmbushin detyrimin e vet dhe janë përgjegjës për përmbushjen e tij”*. Ndërsa me dispozitën e nenit 245 po të njëjtit Ligj parashihet se *“Kreditori në marrëdhënien e detyrimit ka të drejtë që prej debitorit të kërkoj përmbushjen e detyrimit, ndërsa debitori ka për detyrë ta përmbush atë me ndërgjegje dhe në tërësi në përputhje me përmbajtjen e tij”*.

Pra, bazuar në gjendjen e vërtetuar faktike dhe dispozitat e lartcekura gjykata vjen në përfundim se e paditura përkundër kërkesës së bërë nga paditësi nuk ia ka paguar këtë shtesë në emër të pagës së 13-të për vitin 2018, 2019 dhe 2020, pra nga një pagë bazë për secilën vit si dhe nuk ja ka paguar shtesën në pagë prej 30% të pagës bazë pasi që e njëjta punon në punktun në Shalë që është në largësi në tepër se 5 km nga QKMF-ja në Lipjan, për periudhën 12.06.2018-10.06.2021, e që arrin lartësinë si në dispozitiv të këtij aktgjykimit dhe meqenëse nga provat veçanërisht nga Raporti i Auditimit për vitet kontestuse shifet se punëdhënësi ka pasur mundësi buxhetore ngase ka pasur tepërcë buxhetore për periudhat është vërtetuar se e paditura ka pasur mundësi financiare për ti përmbushur detyrimet që rrjedhin nga Kontrata Kolektive Sektoriale e dt.11.06.2018 andaj gjykata e detyroj të paditurën që paditësit t’ia paguaj shtesat në pagë në emër

të pagës së 13-të dhe shtesën prej 30% të pagës bazë për periudhën kontestuse me konkretisht si ne dispozitiv të këtij aktgjykimi.

Me rastin e vendosjes gjykata vlerësoj kundërshtimet e të paditurës të theksuara në përgjigje në padi dhe seancën kryesore, mirëpo të njëjtat kundërshtime i refuzoj si të pabazuara me arsyetimin se mundësit buxhetore për ta përmbushur këtë detyrim e paditura kanë ekzistuar siç u tha më lartë dhe kjo është vërtetuar nga Raporti i Auditimit për vitin 2018 fq.12-të, për vitin 2019 fq. 9 dhe për vitin 2020 fq. 16-të, ku Raporti tregon gjendjen financiare të të paditurës që për vitin 2018 ka pasur tepricë buxhetore prej 1,279.743 euro, për vitin 2019 ka pasur tepricë buxhetore prej 1,276.808 euro, dhe për vitin 2020 ka pasur tepricë buxhetore prej 2,218.292.43 euro, dhe sipas KKS punëdhënësi ka për detyrë që me prova me argumentu mungesën e mjeteve buxhetore dhe se deri në përfundimin e shqyrtimit gjyqësor me asnjë provë nuk e ka provu mungesën e këtyre mjeteve andaj këto pretendime sa i përket bazës juridike të padisë gjykata i refuzoj si të pa bazuara, ndërsa kundërshtime tjera lidhur me lartësinë e kërkesëpadisë nuk ka pasur nga e paditura.

Meqenëse pala paditëse e ka fituar kontestin dhe i ka kërkuar shpenzimet, gjykata në pajtim me nenin 452 dhe 453 të LPK-së, e detyrojë të paditurën që paditësit t'ia kompenzoj shpenzimet e procedurës kontestimore dhe atë: për përpilimin e padisë në shumë prej 104.00-€, për përpilimin e parashtrësës për precizim në shumë prej 104.00-€, për 1 (një) seanca gjyqësore të përfaqësuar nga i autorizuari e palës paditëse shumë nga 135.20-€, si dhe në emër të taksës për padi në shumë prej 60.-€, apo shumen e përgjithshme prej 403.20-€, shpenzime këto që kanë qenë të nevojshme për përfundimin e këtij kontesti për çka është vendosur si në dispozitiv të këtij aktgjykimi.

Nga sa u tha më lartë dhe në bazë të dispozitave të lartcekura si dhe nenit 136 të LMD-së u vendos si në dispozitiv të këtij aktgjykimi.

GJYKATA THEMELORE NË PRISHTINË-DEGA LIPJAN
C.nr.312/21 me dt.12.06.2024

GJYQTARI,
Avdirrahman Gashi

UDHËZIM JURIDIK: Kundër këtij aktgjykimi është e lejuar ankesa Gjykatës së Apelit në Prishtinë në afat prej 7 ditësh nga dita e marrjes së të njëjtit, përmes kësaj gjykate.

Numri i lëndës: 2021:101415
Datë: 26.06.2024
Numri i dokumentit: 05860248